



'Kerakusan rejim Zionis perlu dihenti, malapetaka kemanusiaan meruncing di Gaza'

Oleh Fahmy A Rosli - Oktober 31, 2023 @ 1:09pm
fahmy.azril@bh.com.my

KUALA LUMPUR: Datuk Seri Anwar Ibrahim terus mengecam kekejaman dan penindasan dilakukan Israel terhadap Palestin, apabila mendedahkan kerakusan rejim Zionis yang melangkaui batas kemanusiaan dan undang-undang antarabangsa hingga mengakibatkan ribuan nyawa terkorban.

Memetik maklumat diperoleh daripada pihak berkuasa di Gaza, seramai 8,805 rakyat Palestin terbunuh, manakala hampir 20,000 cedera akibat kerakusan dilakukan rejim Zionis itu.

Daripada jumlah itu, Anwar mendedahkan, sebanyak 3,600 mangsa adalah kanak-kanak.

Selain pertumpahan darah, beliau berkata, serangan bertubi-tubi dilancarkan rejim Zionis terhadap Palestin mengakibatkan ratusan ribu kediaman dan perniagaan musnah sekelip mata.

Susulan itu, bagi menghentikan keadaan itu, Perdana Menteri menggesa semua pihak segera menumpukan perhatian kepada malapetaka kemanusiaan yang semakin meruncing dan mencengkam di Semenanjung Gaza.

"Ini bukti yang mengejutkan berhubung serangan tanpa henti hasil pencerobohan Israel, kekejaman dan sikap tidak berperikemanusiaan. Ini bukan perang Palestin-Israel, ia bukan sama sekali perang."

"Sebenarnya apa yang berlaku di Palestin adalah pembunuhan beramai-ramai terhadap orang yang tidak berdaya di Gaza selama enam dekad."

"Apa yang berlaku terhadap rakyat Palestin adalah disengajakan," katanya di Dewan Rakyat, hari ini.

Perdana Menteri berkata, keadaan di Palestin jelas menggambarkan berlaku pelanggaran undang-undang antarabangsa ekoran tindakan dilakukan Israel terhadap penduduk negara berdaulat terbabit.

Bukan saja pembunuhan beramai-ramai, Anwar mengutuk tindakan Israel yang menghalang penyaluran keperluan bekalan asas kepada penduduk Palestin.

"Kita mengutuk keganasan dan semua bentuknya. Kita mengutuk sekeras-kerasnya tindakan membunuh orang tidak bersalah dan menjadikan wanita serta kanak-kanak sebagai tebusan."

"Pada masa sama, kita juga tegas mengutuk pengeboman tentera Israel terhadap orang awam, kediaman, hospital dan pembunuhan beramai-ramai terhadap nyawa tidak bersalah, kanak-kanak termasuk kaum wanita dan lelaki, yang terus berlangsung tidak kira siang dan malam"

"Perbuatan jenayah ini jelas melanggar norma undang-undang antarabangsa. Selain itu, tindakan Israel memotong penyaluran bekalan makanan, air, bantuan kemanusiaan dan elektrik jelas adalah pelanggaran undang-undang antarabangsa," katanya.

Dengan apa yang berlaku di bumi Palestin, Perdana Menteri berkata, ia seperti satu peringatan yang memeritkan terhadap perjuangan demi mencapai keadilan yang masih tidak menentu.

Sehubungan itu, Anwar menggesa semua pihak mesti bersatu dengan menunjukkan solidariti kepada golongan yang ditindas sambil menegur sistem antarabangsa yang masih lemah.

"Seperti saya nyatakan di Perhimpunan Agung Pertubuhan Bangsa-Bangsa Bersatu (PBB), kredibiliti sistem antarabangsa itu sendiri adalah kita mesti menyuarakan pandangan kita dan menggalakkan orang lain berbuat demikian untuk mengekalkan sistem yang bertujuan menegakkan keamanan di dunia."

"Adalah satu tugas yang bodoh untuk berfikir bahawa Malaysia tidak terjejas dengan apa yang berlaku di dunia. Kami adalah sebuah negara perdagangan yang terbabit secara aktif dalam perdagangan dan ekonomi serantau dan antarabangsa."

"Jadi Malaysia terikat rapat dengan apa yang berlaku di seluruh dunia. Justeru, sebagai negara yang merdeka, kita terus menyatakan hak dan pendirian kita dalam isu keadilan dan kebebasan tanpa rasa takut atau pilih kasih," katanya.